

**BRIEF DISCOURS
ENUOYÉ AU ROY
PHILIPPE NOSTRE
SIRE & SOUVERAIN
SEIGNEUR, ...**



D I S C O V R S

A V Q V E L E S T M O N -
S T R E ' L E M O Y E N Q V I L
*faudroit tenir pour obuier aux troubles
& emotions pour le fait de la Religion,
& à la multiplication & augmentation
des sectes & heresies.*



O M M E ainsi soit que
nous tous qui viuons sous
vn Roy, soyons tenus de
chercher la conseruation du
bié & repos public, ense-
ble & l'entretienemét de la
grandeur & prospérité du Roy, qui est le
chef du corps, dôt nous sommes membres.
I'ay estimé ne pouuoir estre repris d'arro-
gance, si selon le petit don que I'ay receu
du Seigneur, ie tasche de discourir en bref
les moyés qu'on pourroit tenir en ce tēps,
auquel y a grande diuersité d'opinions, à
fin d'obuier à tous troubles & emotions
qui en pourroyent soudre, ainsi qu'auons
apprins par l'exēple de nos voisins, & quāt
& quant satisfaire tant qu'il est possible à
la volonté de nostre Roy & Sire, auquel

par le commandemēt de Dieu, nous sommes tenus d'obeir & de seruir en tout ce qui nous est possible.

D'autant donques que par deçà aussi bien qu'en France, Angleterre & Escosse, & mesmement en Allemagne (combien qu'il y ait quelque petite difference) vne grande partie du peuple se sent esmeu par l'exhortation & doctrine de ceux qui se nōment Euangeliques, (pource que comme ils disent, ils font profession de ne recevoir riens, s'il n'est expressément contenu en la doctrine de l'Euangile) iusques à abandonner l'anciēne & accoustumee façon de seruir Dieu, comme est d'aller à la Messe, confesser, recevoir les Pasques, ieuner par certains iours, aller en pelerinages, & autres semblables exercices, pour s'adijoindre à vne nouvelle doctrine & Religion, qu'ils appellent reformee ou Euangelique. Il est question comment suyuant la volonté du Roy, on pourra maintenir le peuple en l'anciēne Foy, sans cepēdant chercher aucune nouveauté.

Comment on pourra maintenir le peuple en l'anciēne foy, selon la volonté du Roy.

Et si parauenture les moyens semblent difficiles, ou bien impossibles, commēt on pourra obuier aux incommoditez, lesquelles pourroyent soudre de la diuersité qui est entre les habitans du pays.

Premierement donques il est à considerer

rer, que quād on parle d'vne Religion ou Loy, s'entend de parler de la foy & apprehension que les hommes ont conceuē en leurs cœurs touchant Dieu & son seruice, & aussi touchant la doctrine de leur salut: ou bien on ne cōprend par ce mot de Religion, sinon l'exercice & profession extérieure, par laquelle on monstre au dehors ce qu'on croit, ou pour le moins ce qu'on dit croire au dedans.

Quāt on parle de foy, on entend la foy de du cœur ou l'exercice extérieur de la Religion.

Quāt au premier, il est assuré que ceux qui suyuent la nouuelle Religion, ont vne ferme persuasion & impression dans leurs cœurs que ce qu'ils font & croyēt est conforme à la parole & au commādement de Dieu, & qu'il faut sur toutes choses obeir à sō Createur, & plustost endurer la mort & tous les tormens du monde que de contreuenir à son escient à sa dite parole & commandement, en luy faussant la foy.

Veu que ceste maxime est empreinte au cœur des hōmes, que c'est plus que raison que Dieu nostre Createur nous donne tel le Loy cōme bon luy semble, & qu'à nous appartient de luy obeir sans opposition ou exception quelconque. Laquelle maxime on ne sauroit aucunement arracher hors de leurs cœurs, & aussi n'y auroit il nul propos de le vouloir faire, il faut donc chercher autre moyen pour les destourner de

leur foy. Plusieurs ont estimé qu'il y faut proceder par force & espouuâtement, par feux & flammes, & toutes sortes de tourmens, à fin que ceux qui n'ont encore embrassé ceste foy, soyent par ce moyen intimidéz, pour demeurer en leur ancienne façon de faire, & certes ils sont grandement abusez, ainsi que la raison & experience quotidienne le monstrent.

On ne peut dominer sur les consciences & sur les esprits des hommes par le glaive.

Car comment seroit-il possible de dominer sur la conscience, & l'esprit, par choses corporelles? Commét me pourroit-on persuader qu'un homme a mauuaile foy, leq̃l ie voy mourir constâment & ioyeuse mêt, sans qu'autremêt ie sache le fõdemêt ne d'une partie ne d'autre? Certes tout ainsi qu'il est impossible à tous Monarques du monde d'êpescher que le feu n'exerce sa chaleur quâd il a quelque obiect propre à brusler, ainsi est-il impossible à tous hommes

On ne peut empêcher l'esprit de discourir.

quelques puissans qu'ils soyent, d'empêcher l'esprit de l'homme, de discourir & iuger comme bon luy semble, & de ne s'appliquer à ce qu'il trouue conuenable à son impression naturelle. Et qu'ainsi

Qu'est-ce qu'on a profité de mettre à mort tant de pources gens? L'experience le monstre.

soit, l'experience le môstre iournellemêt. Car qu'est-ce qu'on a profité, d'auoir mis à mort tât de pources gens pour la foy? de quoy ont serui les feux, gibets, eschaffauts & tortures, dont on a vû en Frâce, en Ang

gleterre

gleterre, & mesmement par deçà ?

Certes icy ne sert ne puissance ni auctorité des hommes, ni aigreur de tous les tormens du monde. Les Roys d'Egypte *Les roys d'Egypte estoient trespuissans: mais ils n'ont seu dominer sur la conscience du peuple Iudaïque.* ont esté fort puissans, mais ils ne peurent onques dominer aux consciences du peuple Iudaïque. Les Empereurs Romains tenoyét presque l'vniuers en leur subiectiō, & si n'ont espargné ne feu ne flammes, ne croix, ne gibets, ne cordes, ne tortures, n'aucune sorte de tormens, qu'ils ont peu auiser, afin de defraciner la foy Chrestienne, & intimider leurs subiets pour les en destourner, & les tenir à leur ancienne foy & religion payenne. Et toutesfois ils n'ont rien auancé leur entreprise, mais au contraire, ils l'ont fort reculee, de sorte que les Chrestiens souloyent vser entr'eux d'un commun prouerbe, que le sang des martyrs estoit la semence de leurs Eglises. *Prouerbe ancien des Chrestiens: Le sang des Martyrs est la semence de l'Eglise.*

Et de fait Iulian Empereur apostat, homme malin & cauteleux, voyant que pour extirper la religion Chrestienne, tous les predecesseurs n'auoyent en rien profité, ains au contraire, qu'elle estoit beaucoup augmētée par le moyē des persecutiōs, & que ceux qui mouroyent pour leur foy, tournoyent cela à grande gloire & louange, il ne les voulut de là en auant persecuter ne par feu ne par glaiue, ne par aucune

*Iulian Pape-
stat Empe-
reur.*

violence corporelle cōbien qu'il leur portast vne haine mortelle : mais tascha par douceur & persuasions les retirer de leur foy, & se deportant de toute violence exterieure , cercha toutes sortes de ruses pour empescher leur multiplication : & de fait il en profita beaucoup d'avantage , d'autant que les vns per avarice, les autres par ambition se laissoient persuader à ce, ou on ne les auoit seu contraindre ne par force ne par menaces.

Avarice & ambition.

Ie ne veux pas icy accōparer, ceste nouvelle sorte dont il est question, avec la religion Chrestienne , (car ce n'est pas mon intention d'interposer mon iugemēt) mais seulement ie veux conclure , qu'en ce qui gist en la persuasiō du cœur, la violēce corporelle n'y sert nō plus, q̃ la vapeur & vent du soufflet à empescher la chaleur du feu, cōme l'experience de tout tēps a monstré.

La force & violence ne peut empescher la Religion.

Il reste dōc pour les destourner de leurs opiniōs, qu'on leur persuade, que leur foy n'est pas cōforme à la parole de Dieu (ainsi qu'ils se donnēt à entendre) pour à quoy paruenir, il n'y a autre moyen, sinon qu'on leur donne audience libre, afin qu'ils puissent en toute liberté proposer leurs raisons & motifs, & que par la parole de Dieu on les conuainque d'erreur & d'heresie. Que s'ils demeurent opiniastres , tant y a
que

On doit donner audience à ceux de la nouvelle Religion.

que quand ceste dispute & remonſtrance ſe fera à la veuë de tout le môde, ceux qui ſont infirmes, pourrôt eſtre par ce moyen induits à ne ſuiure leurs erreurs.

Car quant aux opiniaſtres tout ainſi que la remonſtrâce ne leur ſeruiroit de guerres, auſſy beaucoup moins le feu & la mort les pourroyent deſtourner de leurs opinions. Mais tant y a que ceux leſquels voyans mourir les autres en toute conſtâce, prennent plaſiſr de chercher leurs opinions, & par ce moyen viennent à cheoir au meſme inconuenient, ſeroyent entierement preſeruez quand ils les orroyêt eſtre conuaincus par la parole de Dieu, & par raiſons auſquelles ils ne ſauroyent contredire.

Si on leur pouuoit ſermer la bouche par l'Eſcriture on garderoit beaucoup de gens de tomber en erreur

Si donc les Prelats & Eueſques ſe conſient en la bôté de leur cauſe, ainſi comme ſelon toute raiſon ils doiuent faire, il n'y a au monde meilleur moyen de paruenir à l'intention du Roy, & empescher la multiplication des ſectes, que de conferer par enſemble en public afin que tout le môde cognoiſſe, que c'eſt à fauſſes enſeignes que les autres ſe vantent d'auoir la parole de Dieu de leur coſté.

Les Eueſques ayans la verité de leur coſté, ne doiuent craindre aucun menſonge, car la verité vainq tout.

Car c'eſt vne choſe toute reſoluë, qu'incontinêt que la verité eſt miſe au paragon du menſonge, il faut neceſſairemêt qu'elle demonſtre ſa clarté & obtiene la victoire,

descourant à la veuë d'un chacun ce qui est faux & couuert.

Et par ce moyē y aura vn tresgrand biē que ceux lesquels ne scauēt maintenāt que suiure en vne si grande diuersité d'opiniōs pourront asseoir ferme iugement de la verité apres auoir ouy les fondemens d'un costé & d'autre, moyennant qu'en la conference toute confusion & desordre, toute crierie & mesdisance soit esloignee.

Ainsi on a veu és disputes & conferences que sainct Paul a fait tant enuers les Iuifs que contre les Payens, incontinent ceux qui cerchoyēt la verité, cogneurent qu'il auoit raison, & que les autres estoient en erreur. Ainsi au concile de Nicee furēt admis les Arriens de proposer en toute liberté leurs raisons & fondemēs, & estans conuaincus par la parole de Dieu d'erreur & d'heresie, furent cōtraints pour vn certain tēps de se deporter de leur entreprise : mais incontinent qu'on les persecuta, ils eurent aussi tost grand nōbre de disciples, esmeus les vns par misericorde, les autres par leurs fausses paroles, de sorte que cela fut cause de tresgrands inconueniens & maux en toute l'Eglise.

Mesmement de nostre temps on a veu que par tout ou les Anabaptistes ont esté persecutez, ils se sont infiniment augmētez:

S. Paul a disputé contre les ennemis de la verité.

Les Arriens ont disputé librement au concile de Nicee.

Les Arriens estans persecutez ont gagné beaucoup de gens à eux.

Anabaptistes croissent fort estans persecutez.

tez: & au contraire, là ou ils ont esté ouis en dispute & conference publique, & conuaincus par la parole de Dieu d'erreur & d'heresie, ils n'y ont plus en nul credit du monde.

Voilà la raison, pourquoy Mahumet a tant songneusement defendu, qu'on ne vint iamais à debatre ou disputer sur les poincts de la religion par luy introduite, scachant bien que la verité estant vne fois mise au paragon de ses mensonges, il faudroit necessairement que sa doctrine s'en allast en fumee.

Mahumet defend de disputer de sa religion.

Et de fait, c'est la vraye marque de la verité, qu'elle desire estre manifestee & debatuë, estant semblable à la palme, d'autât plus qu'on la presse & charge pour l'opprimer, tant plus haut & droit elle s'esleue. Et c'este est la raison pourquoy les anciens ont ordonné de tenir tous les ans des conciles libres & generaux, combien que par la corruption du temps, plusieurs abus y ont esté entremeslez par ambition & auarice de ceux qui y deuoyent opiner. Tant ya que les heretiques & sectaires ne craignent rien au monde tant que d'estre manifestez, soit en quelque concile libre & general, soit en autre lieu, là où les matieres soyēt libremēt debatuës d'un costé & d'autre. Ce qu'on voit aujourd'huy manifestement

*La verité desire se monstrer.
Le naturel de la palme.*

Les conciles libres tous les ans.

Les heretiques craignent la dispute.

Bon conseil.

ment aux Anabaptistes, lesquels fuyēt toutes disputes plus que la mort.

Que si donques ceux qui desirent extirper ceste nouuelle religiō, qui tant se multiplie, s'asseurent bien de la bonté & verité de leur cause, & de la fausseté de leurs aduersaires, il n'y a moyen plus propre au monde, que de venir publiquement en ce camp, & donner libre audiēce, & puissance de disputer à leurs aduersaires. Et certes s'ils maintiennent heresie, il ne faudra ne feux ne gibets pour empescher le cours de leur doctrine, d'autant que tant plus elle se manifestera, & tant plustost elle s'esuanouira.

Et ne sert à propos de dire, qu'ils ont esté souuent ouïs & conuaincus. Car ores qu'ainsi fut, tant y a que la multitude du peuple, lequel s'y adonne à grandes troupes, vaut biē certes qu'on prenne derechef ceste peine de les endoctriner, en oyant & debatant leurs raisons. Mais quād tout est dit, ils n'ont iamais esté ouys en patience. Car dès q̄ Luther commēça à prescher de ceste doctrine en Alemagne, elle fut aussy tost condamnée par le Pape, & persecutée, par tous les Princes & Roys de la Chrestienté. Vne fois fut il appellé a estre ouy, mais c'estoit pour ouïr s'il se vouloit desdire, ou bien maintenir ses escrits & sa doctrine.

*Ceux de la
nouuelle Re-
ligion n'ont
iamais este
ouys en pa-
tience.
Luther.*

ctrine. Luy au contraire ne protesta rien tant, que le desir qu'il auoit d'estre mieux enseigné & instruit par l'Escripture. Et fut la procedure semblable à celle qu'on tint contre Iean Hus au concile de Constance, lequel ne fut onques ouy en ses defenses, mais aussi tost qu'il fut là arriué on luy mist en auât certains articles tirez par quel que sien aduerfaire, hors de ses liures, & on luy demandas'il vouloit maintenir tels articles reprouuez & condamnez par la sainte Eglise, & sur cela on dóna la sentence, qu'il estoit heretique & damnable. Ce que tout le monde voit estre contre tout droit & raison.

Iean Hus au concile de Constance, & comme il fut traité.

De dire que ceux-cy ont esté condánez par autres cõciles precedés, n'est aussi à propos. Car s'il est ainsi cõme on dit, il sera tât plus aisé de les cõvaincre aussi maintenât. Car les Anciens peres, n'ont iamais condáné aucune doctrine, sinon celle qu'ils iugeoyent estre cõtraire à la parole de Dieu. Laquelle ils ont alleguee à cest effet, ie di pour cõvaincre les erreurs & heresies. De sorte que maintenant la voye sera froyee, & ne faudra sinon alleguer les mesmes escriptures pour aussi conuaincre ceux-cy. attendu, que la parole de Dieu demeure eternellement, & l'Escripture a autant de force & de vertu pour conuaincre les heresies

Anciens peres.

La parole de Dieu est aussi vertueuse que iamais pour conuaincre les heretiques.

comme elle eut onques. Mais de les vouloir conuaincre par le seul nom & autorité de quelques conciles derniers sans alleguer les Eſcritures & raisons deſdits conciles, ſeroit du tout hors de raiſon. Car ils ſe ſubmettent de prouuer que les conciles auxquels leur doctrine a eſté condânee ne ſont que conciliabules, assemblez & emologuez par la tyrannie d'aucuns, lesquels ſeuls y ont decreté ce qu'ils ont voulu cōtre l'autorité des Eſcritures, ſans ouir ou admettre leurs aduerſes parties.

Conciliabules

Aucuns Eueſques anciens ont reietté certains conciles comme contraires à la parole de Dieu.

Et certes en l'Egliſe ancienne, ſe ſont trouuez pluſieurs ſaincts Eueſques, lesquels ont reietté aucuns cōciles cōme ſuſpectſ & nō legitimez, ne fondez ſur l'autorité de la parole de Dieu, ains pluſtoſt ſur l'autorité des hommes. Comme nous liſons de Maximus eueſque de Ieruſalem, Et de S. Hilaire eueſque de Poitiers, Voire & auſſi de S. Athanaſe, Chryſoſtome & Photinus. Si que ce n'eſt pas ſans raiſon q̄ beaucoup de ſiecles apres eux, il y a eu quelques conciles, lesquels ſont ſuſpectſ à ceux-cy. Mais quant aux plus anciēſ & receus d'un coſté & d'autre, ils ſont contens de les aduouër entant qu'ils ont approuué leur dire par la dite parole de Dieu. Il ne reſte donc ſinon qu'on les oit & eſcoute leurs raiſons, qu'un chacun puiſſe cognoiſtre ce qui en eſt, & ſe
garder

Ceux de la nouuelle Religion ſont contens de recevoir les conciles accordés avec la parole de Dieu.

garder de leurs erreurs & heresies, veu qu'il n'y a autre moyen au monde pour procurer la paix publique, & reduire tous les subiets à vne Religion. Que si leurs aduersaires, (tout ainsi comme s'il n'y auoit nulle controuersie en ce poinct) s'attribuent le nom de l'Eglise, & sans vouloir ouir debatre leurs raisons par l'Escripture, veulent que tout ce qu'ils ordonnerôt & decreteront soit infailliblement tenu pour ordonnance de l'Eglise & par consequēt de Dieu, ainsi qu'ils ont tout notoirement fait au concile de Trente, auquel le Pape a esté le chef, & n'y a esté appelée l'aduersē partie, sinon pour estre cōdamnee & iugee selon les ordonnances de l'Eglise, (cest à dire dudit Pape & Prelats à luy subiets) ou biē pour se desdire, & estre receuē en grace. Certes, il n'y aura iamais moyen de les retirer de leur foy, veu que ceste maxime demeurera tousiours empreinte en leurs cœurs, Qu'il faut en tout & par tout suyure la parole de Dieu, & qu'elle seule doit auoir l'autorité de iuger toutes controuersies, & de diffinir quelle est la vraye ou la fausse Eglise. Laq̃lle maxime, iamais ne leur pourra estre arrachee par l'autorité d'homme quelconque, tant s'en faut que le Pape & ses Prelats ayent ce credit enuers eux, & beaucoup moins encor' par feux & glaiues.

Au cōcile de Trente le Pape y a esté iuge & aduersē partie.

La parole de Dieu doit iuger de tous differens.

glaiues. De sorte que quand leur dits aduersaires ne leur vouldroyent donner libre audience comme dit est, ains vser de violence, ils ne feront sinon empirer leur propre cause, & rédre meilleure & plus fauorable la cause de ceux lesquels ils taschent d'extirper.

Puis donc que c'est vn poinct resolu entre toutes gens de sain iugemét que quand à la foy & persuation interieure, nulle violence corporelle n'y peut mettre ordre, il faut que les hōmes soyent cōuaincus d'erreur en leur cōsciēce. Il reste à vōir sur le secōd poinct q̄ nous auōs proposé assauoir si on ne sauroit pour le moins empescher l'exterieur exercice de leur religion, en leur defendant de ne s'assembler, ne de prescher ou dogmatizer ne faire exterieuremēt profession de ce qu'ils croyent au dedans. Et premieremēt en cas, qu'il fut aucunement faisable, si touteffois il seroit bon & requis de le faire.

O rest il ainſy que toute religion qu'elle qu'elle soit ne peut cōsister, si ce n'est qu'il y ait quelques exercices & ceremonies exterieures, par lesquelles elle soit entretenue. Dont à bon droit souloit dire L'empereur Gratian, qu'il estoit du tout necessaire, que le peuple fut maintenu en vne discipline exterieure de quelque religion, qu'elle

*S'il seroit bon
de defendre
leur exercice
de Religion.*

*L'empereur
Gratian &
ce qu'il sou-
loit dire.*

quelle fust ou bõne ou mauuaife. Car selon que le naturel de l'hõme est enclin à vouloir assopir sa conscience, & reietter le ioug de Dieu, il est force qu'il soit bridé & contenu en discipline, où autrement il semblera vn cheual eschappé, s'adonnât à vne licence desbordée, reiettant la crainte de Dieu & des hommes.

En aduis pour entretenir les hommes en leur deuoir & office.

Ne pouuant donques desraciner la foy que ceux-ci ont en leurs cœurs, il n'est nullement bon (encor' qu'il fut faisable) de leur empescher leur discipline exterieure, & les exercices par lesquels le peuple est maintenu en leur religion, & en la crainte de Dieu & du Magistrat. Si ce n'est qu'en lieu qu'eux en leurs assemblees sont enseignez d'estre gens de bien craignans Dieu, & portans honneur au Roy & à ses Officiers, on en vueille faire des meschâs Atheïstes, Libertins, & seditieux perturbateurs de tout ordre & police.

Nota.

Et qu'ainsi soit l'experience quotidiene le monstre euidemmét. Car nous voyons aujourd'huy vn nombre de ceux lesquels ayans reietté le ioug de l'obeissance de l'Eglise Romaine, se mocquans de la Messe & des Prestres, & toutesfois pour crainte de perdre leurs biens ou leurs honneurs, ne se sont voulus adonner à discipline & exercice de quelque autre religion, estre deue-

Il faut que l'homme soit entretenu en quelque religion, ou il deviendra sans Dieu.

nus du tout Atheistes sans Foy & sans Loy.

*Libertins de
nostre temps.*

Mesmement il y en a non petit nombre de vilains libertins, lesquels sont sectés à part eux, enseignant qu'il ne faut servir Dieu exterieurement par aucune forme ou discipline externe, ains seulement en esprit & liberté.

*Contre vne
nouvelle secte
que le diable
a suscitée de
puis peu de
iours.*

Et sous ce pretexte, ils s'adonnent à toute vilainie & abomination, à meurtres & rapines, à incestes & adulteres, estimas que les choses de dehors ne seruent de rien, moyennant que le cœur soit net, comme ils se persuadēt, voire & sont venus iusqu'à là, que les vns se vantent estre Christ mesme, les autres l'esprit de Dieu, les autres la charité: Bref, ce sont gés du tout profanes & cōtempteurs de Dieu & du Magistrat, maintenans qu'on ne peut vser du glaive, ne de superiorité entre les hommes, mais que l'esprit doit gouverner & pousser le cœur de l'homme par tout où il luy plaist.

*Abus en l'E-
glise cause
de grans
maux.*

Ce qui n'aduiet par autre occasion sinon d'autant, que voyas les grans abus qui ont regné & regnent encores en l'Eglise, & d'autre costé ne leur estant loisible de s'adjoindre à quelque discipline & exercice de Religion, ils viennent iusqu'à là que d'estimer que la simulation n'est mauuaise, moyennāt que le cœur soit bon, & se moquans ainsi de la religion, laquelle ils font
sem-

*Des simula-
teurs.*

semblant de tenir, ils ne peuuent tomber qu'en vn meschant atheisme.

Et n'y a gens au monde plus seditieux & perturbateurs de tout ordre que ceux-ci ainsi qu'à esté veu aux Anabaptistes de Munster & leurs semblables, pour lesquels extirper, il n'y a meilleur moyen (qui voudra considerer toutes choses sans aucun preiudice ou passion) que de permettre voire & de commander expressément que tous ceux qui font profession de la Religion qu'on appelle reformee ou Euangelique, ayent à s'assembler à la veüe de tout le monde, & entretenir bonne discipline cōuenable à l'obeïssance qu'õ doit à Dieu, & au Magistrat, en corrigeât tous vices & desbordemens.

Les Anabaptistes de Munster.

Bon & saint conseil pour le profit du Roy & de ses subiects.

Car ores qu'il ny eust autre bien, tant y a que par ce moyé on gagneroit ce poinct (qui est de tres-grande importance pour la conseruation du repos public) qu'au lieu, que tous les iours on voit pulluler nouuelles & abominables sectes pleines de sedition & de mutinerie & mesmemēt horribles blasphemes cōtre la Maïesté de Dieu, alors il n'y auroit que deux façons publiques à la veüe de tout le monde, se tenant chacune d'icelles à l'obeïssance qu'on doit à Dieu & au Roy. Et si tost qu'il y foudroit quelque nouvelle opinion, il seroit

bien aisé d'y obuier par la parole de Dieu.

Mais pour autant que cecy semble à aucuns par trop estrange, de donner aux heretiques liberté de semer leurs heresies, regardons s'il est possible d'empescher qu'ils ne s'assemblent. Et certes si nous auons esgard à l'experience, parfaite maistresse de toutes choses, on trouuera qu'il est autant possible de l'empescher, comme il est impossible d'empescher qu'ils ne croient ce qu'ils pensent estre conuenable à la parole de Dieu.

*Experience
maistresse de
toutes choses*

*L'Empereur
Charles 5.^e n'a
rien profité
par sa ri-
gueur.*

*La rigueur
des placarts.*

Carie vous prie n'auons-nous pas veu la grande puissance du feu tres-victorieux Empereur Charles de tres-heureuse memoire, laquelle faisoit trembler vn mode? N'auons-nous point veu sa diligence presques incroyable d'ot il vsoit, pour trouuer moyé d'empescher que ceste Religion ne s'auançast? N'auons-nous point veu la grâ de rigueur des placarts dont il a vsé? Et à quoy tendoit-il, sinõ à empescher que ceste nouuelle Religion ne fut preschee, & que ceux qui en faisoient profession voulussent se deporter de leurs assemblees, car il scauoit trop bié, qu'il ne pouuoit forcer leurs cœurs, & toutesfois il n'a rié auancé, quelques defenses qu'il ait faites.

Peut estre qu'ils alloyent s'assembler en quelque pays estrâge, là où ils auoyét plus grande

grande liberte. Nenny non : mais au contraire, tous les Princes de la Chrestieté ensemble avec le Pape estoient resolués à les extirper, & ne leur donner aucune place où ils se pussent retirer, & cependant tout a esté en vain. Commét pensons-nous doncques, que la puissance du Roy qui n'est certes point plus grande que celle dudit Empereur, les puisse empêcher? veu que maintenant la France, l'Allemagne, l'Angleterre, & tous les pays à l'entour leur sont ouuerts pour s'y retirer & vsér de la liberte qui leur est icy deniee? Là où ils ont tant de Princes & des Rois de leur costé? Là où le nombre est multiplié par vne infinité de milliers? là où les liures sont leus & veus d'un chacun? Certes ceux qui donnent ce conseil à sa Maiesté, mōstrent euidemmēt ou qu'ils sont despourueus de sens, ou bien qu'ils cherchent d'establir leur propre grandeur au dommage du Roy & à la ruine du pays.

Qu'on regarde toutes les histoires du monde, on trouuera que quand quelque nouvelle religion a esté fondee sur la persuasiō interieure de la parole de Dieu, que tous les efforts du monde n'ont peu empêcher, que l'exterieure discipline d'icelle n'eut quant & quant son cours. Et de fait, les Empereurs Romains, lesquels estoient

Toutes entre prises faites contre ceux de la nouvelle Religion sont allee en fumee.

Quasi tous les pays d'Europe sont ouuerts pour recevoir en liberte ceux de la nouvelle Religion.

Conseil dommageable au Roy.

L'Empereurs Romains dix fois plus puissans que les Roys d'aujourd'huy.

dix fois plus grans terriens, que ne sont les Roys les plus puisés d'aujourd'huy, n'ont onques peu forcer les Iuifs, à receuoir seulement leurs statuës en leurs temples : aussi n'ont-ils peu aucunement empeschier les assemblees des Chrestiens, ores qu'ils n'eussent lieu au monde où se retirer, sinon les bois, cauernes & rochers, là où ils aimoyēt mieux viure à la façon des bestes sauages, qu'abandonner l'exercice de leur religion. Je ne veux pas debatre si la querelle de ceux-ci est semblable à celle-là : mais tāt y-a qu'ils sont aussi bien persuadez en leur cœur, qu'ils suyuent la parole de Dieu, & qu'il leur est commandé de s'assembler & prescher, comme ceux-là estoient : laquelle persuasion ne leur pourra estre iamais arrachee par aucune violēce quelque qu'elle soit.

Car ils disent entr'eux que quād on leur permettroit de croire ce qu'ils veulent, moyennant qu'ils se deportassent de dogmatizer & de s'assembler, est autant, comme si on permettoit à vn homme de viure cent ans, moyennant qu'il ne print iamais refection ne nourriture. Car ils maintiennent que la foy est entretenue par la predication de la parole, tout ainsi que la vie du corps s'entretient par la nourriture du repas. Et accommodent à ceci le passa-

*Les Chrestiens
s'assembloyēt
en deserts.*

*On ne peut
viure sans
manger.*

ge de S. Paul disant, que la foy vient par l'ouye où par la predication.

La foy vient par l'ouye de la parole de Dieu.

Mesmemment ils maintiennent fort & ferme que l'Euāgile n'est autre chose qu'une bonne nouuelle, laquelle s'anonce & presche aux hommes. si que sans ceste predication, l'Euangile ne seroit rien. Voila pourquoy (disent-ils) Christ commanda à ses Apostres, en partant d'eux, qu'ils allasent endoctriner, & prescher l'Euāgile. Et quand il fut griuement defendu aux Apostres de ne prescher au nom de Iesus, ils respondirent qu'il falloit plustost obeir à Dieu qu'aux hommes. De sorte que si on ne leur donne à entendre par quelque autre façon qu'ils sont en erreur; & que leur doctrine n'est pas conforme à l'Euangile, c'est tout en vain qu'on leur veut defendre leurs assemblees & predications.

Matt. 28. 19

Marc. 16. 15

Act. 4. 19

Il faut obeyr à Dieu plustost qu'aux hommes.

Mais posons le cas qu'il y eut quelque apparence de le pouuoir faire, certes il y faudroit proceder ou par rigueur & force, ou bien par douceur & promesses, c'est à dire, il faudroit necessairement ou les rompre ou bien les forcer, à faire contre le tesmoignage de leur conscience, & fausser la foy qu'ils doiuent à Dieu.

Les hommes vertueux choisiront plustost mille morts que faire contre leur conscience.

Or il est asseuré que les constans & vertueux choisiront plustost mille morts, que de faire chose qui soit cōtre leur conscien-

*Il ne faut riē
esperer de biē
de celuy qui
pour le mōde
changera de
foy.*

ce. Si qu'enuers ceux-là on ne pourroit de rien profiter. Quant aux autres qui pour crainte ou pour esperance renieroyent la foy laquelle en leur conscience ils tiendroyent pour bonne, premierement ils offenseroyēt tres-grieuemēt la Maicsté diuine, & ne pourroyent sinon condāner leurs ames, par ceste fausseté & simulation, d'autant qu'ils pecheroyent doublement. Premierement pour auoir embrassé l'erreur, & puis d'auantage pour auoir faussé la foy & tesmoignage de leur consciēce, & auoir procedé en double cœur là où Dieu requiert sur tout sincerité & rōdeur, de sorte que ceux qui les forceroient à cela, seroyent cause de leur plus grieve dānation.

Puis aussi quant aux hommes, que sauroit-on esperer de bien de telles gens, lesquels pour l'honneur & bien de ce monde seroyent contēts de renier le Dieu viuāt? Car sans doute mille de ceux-là renient Dieu, lesquels pour quelque respect de ce monde font contre leur conscience & leur propre foy. De sorte que ceux qui donnēt ce conseil au Roy de forcer & corrompre ses subiets, afin de simuler autre religion que celle qu'ils tiennent en leur cœur, sont cause de la desloyauté qui se commet enuers Dieu, & enuers le Roy. Car certes celuy qui se porte desloyaumēt enuers Dieu

ou pour crainte ou esperâce, est à presumer que par les mesmes passions il se portera aussi desloyalement enuers le Roy, là où le temps & l'occasion s'y adonnera.

*Celui qui se
ra desloyal à
Dieu, le sera
bien aussi au
Roy.*

Beaucoup plus prudement aduisa Constantin le pere de Constantin le grand, lequel combié qu'il fust Payen & contraire à la religion Chrestienne, toutesfois il appelloit en sa Court, & receut en sa familiarité les Chrestiens lesquels il voyoit estre prests d'abandonner plustost les biens & honneurs voire & la vie propre, que de se porter desloyalement enuers le Dieu qu'ils adoroient. Mesmemét il iugea que ceux-là estoient vraiment dignes de son amitié, & leur communiqua toutes ses affaires les plus intrinseques. Et de fait, le Roy n'a plus de fideles subiets que ceux qui luy obeissent pour la conscience, c'est à dire, pource que Dieu l'a ainsi commandé.

*Constantin
Payen rece-
uoit les Chré-
tiens à cause
de la loyauté
enuers leur
Dieu.*

Ceux donc qui faussent leur conscience, ou pour complaire au Roy, ou bien pour autre respect particulier, monstrent assez qu'ils n'obeissent point au Roy pour la conscience, mais plustost pour quelque affection particuliere. Et s'ils ne font difficulté, de fausser leur conscience, à l'endroit du seruice de Dieu, certes il est à craindre que quand quelque passion ou affection les inciteroit, assauoir, ou crainte de

*Le Roy n'a
point de fide-
les subiets
que ceux qui
luy obeissent
pour la con-
science.*

Nota bene.

*Conseil ma-
lin donné au
Roy.*

mort, ou perte de biens & credit, ou bien quelque chose semblable, ils ne feroient aussi grande difficulté de fausser la foy, qu'ils doiuent au Roy si bien qu'ils faussent celle qu'ils doiuent à Dieu, pour lequel ils deuoyent obeir au Roy. De sorte que ceux qui donnent ce conseil à sa Maiesté, descourrét leur bestise entant qu'ils vellent extirper ceux qui en simplicité & sincerité de cœur rendent obeissance à Dieu & au Roy.

Et quant à ceux qui procedét desloyau-
mēt & contre leur conscience, ils sont con-
tents, non seulement de les souffrir, mais
aussi leur faire beaucoup de biē & d'hon-
neurs & leur dōner entremises, ainsi qu'on
a peu veoir par quelques exēples de ceux
lesquels ayans fait autrefois profession de
ceste Religion nouvelle, puis apres, sans
estre conuaincus d'erreur, seulement pour
paruenir à honneur & credit ont tourné
leur manteau. Mais l'experience à monstré
& montrera encores avec le tēps, s'ils ser-
uent au Roy en plus grande sincerité, &
meilleure foy, qu'ils n'ont serui à Dieu.

Tant y a qu'encores qu'on peut forcer
ou bien corrompre ceux de ladite Reli-
gion, à abandonner l'exercice de leur Reli-
gion, & faire cōtre leur consciēce si est-ce
qu'il ne seroit nullemēt expedient pour le
bien

bien public. Mais cōme i'ay dit, il n'est aucunement possible de les empescher en cela, si ce n'est qu'on les vueille saccager & mettre à mort.

A quoy certes malaiseement on pourra paruenir: & ores qu'ō peut, si est-ce qu'on ne profitera de riē. Car en lieu d'un qu'on tuera, il en viēdra dix autres. Car ceux qui meurēt ainsi cōstāmēt plustost q̄ de fausser leur foy, sont tenus pour gens de bien du commun, & on a plustost esgard, à leur cōstāce, que non pas à la cause qu'ils maintiennent, de sorte qu'un chacun pense en foy-mesme, voicy ceux qui choisissent plustost vne cruelle mort que de renier vn seul poinēt de ce qu'ils pensent estre conuenable à la parole de Dieu, & moy à grād peine voudroy- ie souffrir mal en vn doigt pour ma foy. Il faut donc dire que ceux-ci foyent plus gens de bien que moy.

Pour vn mis à mort, il en reuient dix, voire cent.

Bonne consideration.

Et par ce moyen il leur prend enuie de rechercher la cause, & viennēt à tomber en mesmes opinions, de sorte que ce moyen ne peut causer sinon grand accroissement & multiplication d'iceux. Et de fait, eux mesmes s'y glorifient, disans que les cendres de ceux qu'on brusle, est la semence de leurs Eglises. Et mettēt en lumiere des Histoires qu'ils appellent de leurs Martyrs, Liure des par lesquels ils en tournēt plus à leur foy, Martyrs.

que

..75..

"522"

15. 275.

que par autre moyen quelconque. Si que ceux qui conseillent au Roy d'vser de tels moyens, sont bien mal-aduises. Car outre ce qu'ils reculent plustost l'intention de sa Maiesté, encore mettent-ils tout le pays en vne tresgrande desolation, en danger tres-euident de prochaine ruine. Car

Les arts & mestiers desquels le pays florissoit vnt en decadence, & sont trans portez vers les nations estrangeres. On voit à l'œil les arts, mestiers, & traffiques, au moyen desquelles ce pays souloit estre florissant par dessus tous autres. aller presque en decadence, & estre transportez vers les voisins anciens ennemis de la maison d'Austrice & de Bourgongne.

Bonne consideration des traffiques du pays bas. C'est vne chose presque incroyable combien de dommage ont apporté les persecutions de quarante ans en ça à la drapperie, sayetterie, & tapisserie. Lesquels mestiers propres & cōme peculiers à ces pays bas, on a chassé par ce moyen vers les Anglois, François, & autres nations. Je

laisse à parler d'une infinité d'autres bōs & profitables mestiers, qui se sont retirez en pays estranges pour iouir de la liberté de leur conscience. Car en general la traffique des marchandises en à este merueilleusement interresse, ainsi que pourront tesmoigner gens de bien en Anuers, L'isle, Tournay, Valenciennes, & autres villes semblables. Et de fait, ceste occasion à esté l'une des principales, pourquoy ces annees pas-

passées les Anglois se sont laissez persuader de se retirer d'Anuers à Embde, cest a dire de la fleur de toutes les villes marchandes, pleine de comoditez infinies, a vne villette obscure, petite, & n'ayât nulle commodité du monde. Mesmement ils en sont deuenus si fiers à l'occasion de ceste drapperie, despouille de ces païs bas de sa Maiesté qu'ils ne se soucient, ou pour le moins font semblant de ne soucier guerres d'appointer, estimans que nous auons plus à faire d'eux, qu'eux de nous. Les François semblablement se vantent de s'estre vestus de nos despouilles au moyen des marchans fugitifs pour la Religion, de sorte que ce qu'il leur souloit seruir de bride, pour les faire plustost venir a raison en temps de guerre, les rendra maintenant plus fiers & mal-traitables,

Les Anglois considerans l'estat du pays bas, ont pensé de tenir le cousteau sur la gorge au pays.

Outre ce que dās le pays mesme on scait assez qu'il y a marchans bien suffisans, lesquels à ceste occasion refusent de fournir aux finances en temps de necessité, craignans que le fait de la Religion, ne serue a leurs ennemis, & à ceux que ne taschent qu'a choses semblables de les rendre confiscables.

Bons marchans refusent de fournir aux finances

Mais sur tout est a considerer que le fait des armes & de la guerre, lequel a tousiours esté florissant par deça, a senti,

&c

& sentira grand interest, en cas qu'on n'y pouruoye autrement. Car afin que ie ne touche à plusieurs gentils hommes, & autrement bons & fideles Soldats, lesquels pourroyét faire tresbon seruice à sa Maie^{sté}. Ils se tienét maintenât à recoy en leurs maisons craignans pour ceste seule occasi^on de s'employer à quelque entremise que ce soit. Afin aussi que ie ne die que plusieurs autres lesquels desiroyent faire bon seruice au Roy, mesmement de ceux qui cognoissent les alsiettes, & situations des pays, sont contrains de se retirer de leur naturel vers les ennemis, postposans toutes choses du monde, à la liberte de leur consciéce. Il faut certes auoir esgard que si quelque guerre suruenoit fust-ce cōtre les François, Anglois, ou autres pays circonuoisins, on ne sauroit à qui se fier. Et pour certain les ennemis n'oublieroient de faire leur profit de ceste occasion, pour brasser toutes sortes de trahisons & d'embusches, au grand desauantage de sa Maie^{sté}, & de tout le pays.

*S'il aduenoit
guerre contre
nostre Roy,
on ne scau-
roit en qui se
fier.*

Et il est à craindre, qu'entre tant de gēs ils trouueroyent quelques vns, lesquels sous couleur de chercher ceste liberte, se laisseroyét persuader d'entēdre à nouueauté. Et ores qu'ainsi ne fust, si est-ce qu'un bon Capitaine, ou Colonel, ne pourroit
estre

estre en repos quât à cest endroit. Car il ne pourroit bonnement se fier sur laccoustumee vertu & fidelité de ses Soldats . Et quand la guerre ne seroit ouuerte, si est-ce que s'ils auoyét repos & loisir , ils ne cesseroient d'vser de ceste oportunité à solliciter les habitans des villes frontieres à trahison & defection , selon qu'ils sont tousiours aguettans apres quelque occasion.

Les ennemis du pays.

Les villes du pays en danger à cause de cruauté.

Or que gens de basse condition ayent aucunesfois moyenné grandes trahisons, il est assez notoire tât par l'experience que par les Histoires, & en peut rēdre bon tesmoignage la derniere surprise d'Arras faite , comme on scait par le moyen d'un poure vieillard sans entremise aucune sinō qu'il estoit vn de la garde des portes . Et d'autre costé que l'affection de pouoir viure & seruir Dieu en liberté de cōscience, est d'une si grande force, qu'elle fait oublier toutes autres affections & passions quelques vehementes qu'elles soyent, vn chacun le peut veoir s'il n'est despourueu de tout sens & entendement . Car tant s'en faut qu'elle ne pourroit faire oublier l'affection que les subiets portent naturellement à leur Roy , qu'on voit iournellement qu'elle aliene les cœurs des peres & meres de leurs enfans, voire & fait oublier soy-mesme, de sorte qu'ils ne font difficulté,

La ville d'Arras trahie par vn poure hōme.

La liberté de conscience pour seruir à Dieu fait oublier toute autre chose.

té, d'exposer leurs corps aux flâmes ardantes, & à toutes sortes de tourmés & d'abandonner femmes & enfans, meesmement ne leur laisser que poureté & infamie plustost que de perdre ce bien au pris, duquel il n'y à chose au monde qu'ils estiment.

Si que ce ne'st de merueilles qu'on tient pour certain q̃ plusieurs entre les Gascons & Prouençaux, durant les persecutions de Frâce, pour le fait de la Religiō, ont traitté de se rendre tributaires au Turq, esperans que pour le moins on les laisseroit viure en ladite liberté que sur tout ils prisoyent. Et peut estre l'eussent-ils mis en executiō, au grād dōmage de toute la Chrestienté, si vn seul respect ne les en eust destournez, cest assauoir qu'il leur sembloit chose trop grieue de dōner leurs enfans premiers nays au grād Turq pour estre instituez en la Religion Mahumeticque. Car certes ceste affection est incroyable & surpasse toutes les autres quelles qu'elles soyent, ainsi que les exemples de tous aages nous tesmoignent tres-suffisamment.

Il y a danger qu'entre tant de gens patiens il ne se trouue quelques vns pour se venger.

Ce qu'estant de bien pres consideré, & veu aussi la grande diuersité des humeurs & conditions des personnes, ne seroyt chose fort estrange, si en vne si grande multitude de ceux qu'on persecute pour le fait de leur conscience, il se trouuaist quelques

ques vns, plus soudains ou bien plus vindicatifs & impatiens que les autres, lesquels ne fissent difficulté d'entreprendre tels exploits: voire & fust-ce seulement pour vengeance du grief tort qu'on auroit à ceste occasion fait à leurs parens & amis.

En quoy certes est grandement à considérer, que comme ainsi soit qu'il n'y a force ne rempart qui maintienne les Roys en leurs grandeurs & puissances, autât que la bien-vueillâce & fidele amour des subiets: Icy au côtraire le Roy ne fait que prouoquer la haine de ses subiets alencontre de sa Maïesté: & mesmemêt de ceux lesquels autrement sont gens de bien & vivent sans reproche.

Les forces & rempars ne maintiennent les Roys tât que les fideles subiets.

Que si les Inquisiteurs & leurs semblables ne craignent les Huguenots, à cause que comme ils disent ils n'ont pas le sens de se venger, pource qu'ils tiennent qu'il faille rendre le bien pour le mal, toutesfois ils peuuent bié auoir ouy le commun proverbe, que la patience par trop offensée se tournera à la parfin en fureur & rage, & s'ils ne sont du tout despourueus de sens ils doiuent bien penser, que tous les parens, amis, & alliez de ceux qn'on persecute, ne sont pas pourtant d'une mesme intention ne patience, qu'ils puissent ainsi oublier le tort qu'ils s'estiment auoir receu, de sorte

Les Inquisiteurs ne craignent les Huguenots à cause de leur patience.

C qu'ores

qu'ores qu'il n'y eust nul dâger qu'ils deussent entreprendre quelq̃ chose cōtre sa Majesté, ou bien à la diminution de ses estats, tant y a qu'ils porterōt vne haine irreconciliable à ses officiers, & estimeront que ceux-là, ou pour auarice, ou pour quelque autre affection particuliere ayent pourchassé la ruine d'eux ou de leurs parés. Au moyen dequoy y aura tref-mauuaise intelligēce entre les subiets du Roy qui est vne chose, comme chacun scait de tref-grande consequence, ainsi qu'on a peu voir en ces troubles de France, lesquels en partie ont prins leur origine de telles occasiōs. Et est chose manifeste que si le Roy Henry ou bien son feu pere Roy François eussent de leur temps permis à ceux de la nouuelle Religion, libre exercice d'icelle, les bridans de bonnes loix & polices plustost que de prester l'oreille à ceux qui n'estoyēt alterez que du sang de ses subiets, certes ils eussent laissé l'estat de leur Royaume beaucoup plus heureux & florissant, & eussent aisément obuié à tât de calamitez qui depuis y sont suruenuës.

Je say bien qu'il y en a qui disent que par deçà il n'y a rien à craindre de semblable, veu le petit nombre qui y est, & que pourtant ce n'est pas sans raison que pour vne poignée de gens mesmemēt de petite qualité

*La source des
troubles en
France.*

lité & vile condition , on introduise quelque nouveauté. Mais certes ceux qui tiennent vn tel langage , descouurent bien ou leur ignorance par trop lourde ou leur malignité insupportable. Et de fait il n'y a long temps qu'en France ceux qui cherchoient de se faire grands aux despens du pource peuple, semoyét des semblables propos, quand il estoit question de chercher remede conuenable aux incōueniens qu'on voyoit se panscher sur tout le pays. Car ils donnoyét à éntédre à la Roynemere que ce n'estoyét qu'un tas de coquins, & gens de basse condition qui s'estoyent rangez à la nouvelle Religion , & que à cause de ceux-là on ne deuoit rien innouer.

Nota.

On donnoit faux entédre à la Roynemere.

Et toutesfois quand il estoit question de renforcer l'inquisitiō , & la rigueur des placarts, ils fauoyent tresbiē crier que tout le monde deuenoit Huguenot, & si on n'y mettoit ordre, que l'anciēne Religion, s'en alloit du tout à neant. Voire & appelloyét les Huguenots plus q̄ d'autres. Ce n'est pas donc merueille, si le mesme aduient par de çà entre ceux qui sont poussez de semblable affection , car s'il est questiō de donner assisťace aux inquisiteurs, d'instituer Euesques nouveaux, d'enuoyer garnisons aux villes, ils sauent fort bien remōstrer, que si on n'vse de rigueur extreme & de grande

Plus que d'autres.

diligence, qu'il n'y a point d'ordre pour maintenir l'ancienne Religion, & ne font qu'importuner la Court de leurs plaintes continuelles, remonstrâs l'incroyable multiplication des heretiques.

Et quand il est question de trouver doux & amiables moyens, pour mettre le pays en repos sans effusion de sang lors ils disent que les Huguenots sont petit nombre

Mais s'il est questiô de trouver quelque doux & conuenable moyen pour mettre le pays en repos, sans vne si grâde effusion de sâg, lors ils disent qu'il y a si peu de Huguenots, & de si petite qualité, que pour le respect d'eux on ne doit rien innouer. De sorte qu'un chacû peut aiseemêt appercevoir q leur but n'est sinon de se maintenir en leurs estats & richesses, voire & fust-ce avec la totale ruine des pays de sa Maiesté.

Bon conseil.

Parquoy il faut que ceux qui cherchent à bon escient, la conseruation de la grâdeur du Roy & du salut de ses subiets, les retiennent comme suspects: & eux-mesmes en fassent diligentes informations & enquestes, du nombre, qualité, & de la preudhommie de ceux qui desirent estre fideles subiets du Roy, moyennant qu'ils puissent satisfaire à leur conscience. Et certes on en trouuera vn plus grand nôbre, que communément on n'estime. Que si tant seulement on regarde la multitude de ceux qui se sont retirez seulement en Angleterre tant à Londres qu'à Santwick, là où ils ont leurs assemblees publiques en nôbre infini:

Ceux de la nouvelle Religion sont en grand nôbre.

ni : puis qu'on se tourne vers ceux qui se sont retirez en France aussi en tref-grand nombre : de là qu'on face môstre de ceux qui sont à Francfort, à Strasbourg, à Heidelberg, Franckendal, Coloigne, Aix, Dufbourg, Embde, Geneue, & autres plusieurs villes & villettes, certainemêt i'estime qu'on n'en trouuerapàs moins de cent mille. Et quant à ceux qui sont encore dès le pays, c'est vne chose toute notoire qu'il en y a encore beaucoup d'auantage. On a veu à Tournay quand quelquefois ils se sont assemblez ou pour châter leurs Pseumes, ou bien pour faire leurs predications, qu'aucunesfois ils se sôt trouuez de quatre à cinq mille. Le semblable a-on veu notoirement à Valenciennne, sans ceux qui se sont tenus couuertement en leur logis. Et de fait il n'eust esté besoin des garnisons qu'o y a enuoyees, si la multitude n'y eust esté grande. On estime qu'à Lisle il n'en y a gueres moins. Qui voudroit maintenant considerer les villettes & villages circonuoifins, on en trouuera certes vn nombre infini.

Il y a plus de cēt mille Huguenots hors du pays du Roy, & sont d'auantage dedans le pays.

Il y en a vne infinité qui se tiennent couuerts.

Qu'on vienne puis apres en Flandres, & singulierement en la partie qu'on appelle Vvestflanderen, c'est vne chose incroyable de la grâde multitude qu'il y a. Et quelque diligence & poursuite que face le Doyen.

*Prisonnier
deliuré à
Messines.*

de Renes, si voit-il à l'œil qu'il perd sa peine. N'a-on point veu à Messines (si bié me souuient) plus de sept ou huit cents hommes des villages voisins venir forcer les prisons, & en deliurer vn prisonnier, sans que iamais on ait peu sauoir qui s'estoyent, ou qu'on se soit apperceu quelque part de leur défaut ? Je laisse Gād, ie laisse Bruges, où neantmoins il y en a tres-bonne quantité.

*Le nombre
de ceux qui
s'assemblent
en Anuers.
A Bruxelles.*

En quel nombre s'assemblēt-ils en Anuers ? Certes la chose est par trop notoire, voire & à Bruxelles, où la Court est, si ne les sauroit-on empescher qu'ils ne s'assemblent, en assez bon nombre. Que diray-ie de Hollāde, de Zelande, de Gueldres & Phryse, là où il semble qu'ils ont quelque liberté plus grande ? Et de fait, les Officiers ne les osent desormais plus executer n'y rechercher, pour la trop grāde multitude qui y est.

*Vn homme a
presché vn
an à VVt-
recht.*

N'a-on point veu à Vvtrecht ville Episcopale & pleine de puissans chanoines, vn homme de leur party qui se nōmoit Thys, ou bien Steuen, lequel a presché publiquement en chaire tout le long d'vne annee ceste doctrine à la veuē de tout le monde, maugré tous ceux qui s'y opposoyēt, & cō bié qu'ils faisoeyēt extreme diligēce & pour suite ils ne le peurēt onques apprehender, d'autant

d'autant que tout le peuple ensemble l'accompagnoit au dehors & dedans l'Eglise, si qu'aucunefois il estoit porté sur leurs espauls, & logé tâtost en vne maison tantost en l'autre sans que onques on en peut venir à bout. Par où certes on peut veoir ouuertement si le nombre est si petit comme aucuns maintiennēt. Voire & par leurs propos de tables & autres deuises on peut entendre, qu'ils ne se plaignent, sinō qu'on ne leur peut fournir assez de Ministres & predicans.

*Les Huguenots
se plaignent
de faute de
Ministres.*

Certes si tous estoient assemblez en vn lieu, tant ceux qui se sont retirez, que ceux qui encore y demeurent, ie ne doute pas que pour tout le moins, on en trouueroit deux ou trois cens mille. Que si on veut auoir esgard à ceux lesquels sont bien de mesme opiniō avec eux, & toutesfois encores dissimulent, attendans quelque changement ou oportunité plus commode, ie croy certainement que leur nombre conioint ensemble, surpasseroit, ou bien certes egaleroit le nombre des autres. Car en quelle compagnie se peut-on aujourd'huy trouuer soit aux villes ou aux champs, soit aux chariots ou aux basteaux, q̄ tousiours n'étreuienne quelq̄ propos de la Religion, & quelque dispute, soit du Pape, ou des Prestres, des Reliquaires, Indulgēces, Pur-

Nota.

gatoire ou autres choses semblables. De sorte que ceux qui maintiennent que le nombre est si petit, qu'à cause d'eux on ne doive rien innouer ou changer, monstrét bien, ou qu'ils n'ont nul sens ne iugement, ou bien qu'ils vouldroyét regner tous seuls au monde.

L'ignorance de ceux qui disent qu'on ne doit rien innouer.

Aucuns disent que les Huguénots sent toutes gens de basse conditiō

Quant à ce qu'ils disent que ce sont tous gens de basse condition, on a bien veu au contraire en Alemaigne, Frâce, Angleterre, Escosse, Dänemarc, où non seulement le commun populaire, mais aussi les Princes & Roys ont embrassé ceste Religion. Et n'est à douter, si on se pouuoit decouurir sans danger de perdre la vie ou les biens, qu'aussi par deçà vne grande quantité des gentils hommes & gens d'estoffe, se declareroyent estre de leur party.

Mais encore que la multitude ne fut pas si grande, voire & qu'il n'en y eust que biē peu, si est-ce neantmoins qu'il est cōuenable à la clemēce d'un Roy d'auoir esgard au salut du moindre de ses subiets tant qu'il luy est possible suiuant l'exemple du bon pasteur qui nous est proposé en l'Euangile, lequel abandonnoit les nonante neuf ouailles, pour aller recercher vne seule qui estoit perdue, & apres l'auoir trouuee, pria tous ses amis pour se resiouir ensemble avec eux à cause de ceste seule brebis trouuee.

On

On lit d'un Empereur Payé lequel sou-
loit dire ordinairement qu'il aimoit mieux
sauuer vn sien bourgeois & subiet, que
desfaire vn çamp d'ennemis. O senten-
ce digne d'un Monarque & Empereur! Et
de fait les loix Romaines tesmoignét qu'il
vaut mieux absoudre le coupable, que
condamner l'innocent.

*Vn certain
Empereur Ro-
main souloit
dire qu'il ai-
moit mieux
sauuer vn siẽ
subiet que
desfaire vn
camp d'enne-
mis.*

Ceux donques qui estiment qu'on ne
doit auoir esgard à ruiner (tât qu'en nous
est) & ames & corps des pources subiets du
Roy, monstrent bien qu'ils n'ont iamais
entendu, que c'est que requiert, ie ne di pas
la Chrestienté, mais l'humanité, & singu-
lièrement la clemence d'un Roy. le nom de
laquelle, luy rend sa renommee plus glo-
rieuse que tous les trophées & victoires
qu'il sauroit obtenir sur les ennemis.

Mais on dira, que ceux-ci sont gens mes-
chans & prophanes, & qu'ils corrompent
les autres. A quoy ie respon, que hors mis
le seul poinct de la Religion (de laquelle
ie n'ay entreprisicy de iuger) on trouue
qu'ils sont au reste, gens de bien, craignans
Dieu, rendans toute obeissance au Roy &
au Magistrat, & ne faisans tort à personne
du monde. Et combien qu'il en y a entre
ceux qui se couurent de leur nom, qui sont
autres, cela n'aduiét par autre occasion, si
non pource qu'on ne leur permet point

*Obiection.
Responsc.*

*Les Hugue-
nots sont gẽs
de bien obeis-
sans au Roy
& au Magi-
strat, ne fai-
sans tort à
personne.*

d'exercer leur discipline & religion , ainsi comme ils voudroyent bien.

Et quât au poinct de leur Religion, elle sera telle qu'on voudra, mais. si est-ce qu'ils ne sont pas tât persecutez, pour suiure heresie & erreur, comme pour estre constans & fideles en ce qu'ils pensent estre conforme à la volonté de Dieu , car on leur permet de croire ce qu'ils veulent (& de fait,

S'ils estoient si meschans comme plusieurs les esti- ment, ils fe- royēt ce qu'o- requiert de eux, & tien- droyēt autre chose en leur cœur.

Les plus do- ctes & lettres & humaines & les meilleurs esprits tiennent leur party sans nul despriser.

Ils ont re- staurez la co- gnoissance des langues.

on ne les sauroit empescher) moyennant qu'ils veulent estre desloyaux & hypocrites. Et puis qu'ils se submettent à estre mieux enseignez par la parole de Dieu , il n'y a point de raison de les estimer ainsi meschans comme on fait.

Dauantage il faut maugré q̄ nous en ayons, que nous cōfessions que les plus grâds & meilleurs esprits , & les plus doctes & lettres maintiennēt leur party. Je ne veux pas despriser les autres. Mais si est-ce, que si on postpose tout preiudice & affection, on trouuera, que les plus singuliers esprits ont estés & sont encore des leurs. Mesme- ment l'inltauratiō de plusieurs arts & sciē- ces (lesquelles estoient enseuelies en tenebres) sont procedee d'eux. La cognois- sance des langues, & singulierement de la Grecque & Hebraïque a esté plus cultiuee par leur labeur & industrie, que par nul des autres. Et plusieurs choses & secrets

tant

tât de la Theologie que de la cognoissance des Histoires, ont esté par eux produits en lumiere. Bref, leurs aduerfaires mesmes sont contrains de confesser, qu'il y a entre eux des hommes-tressinguliers, en toute sorte de sciences. Outre que leur vie (certes de plusieurs entre eux) est irreprehensible.

Louange de ceux de la nouvelle religion.

Ores donques qu'il n'y eust pas si grande multitude comme il en y a, toutesfois on deuroit auoir respect qu'on ne ruinaist & chassast ceux que Dieu a douë de graces si excellentes & qu'on ne priuast le Roy & son pays de si grands biens en chassant & meurtrissant ceux, lesquels pourroyët grâdemët seruir ou de conseil, ou d'erudition ou de quelque autre moyen, veu qu'on trouue ordinairement qu'ils ne desirent sinon rendre toute obeïssance à sa Maïesté, & de la seruir de corps & de biës, pourueu seulemët qu'on leur laisse l'exercice de leur Religion libre.

De sorte que pour conclusiõ, s'il plaisoit à sa Maïesté de leur octroyer ceste liberté, non seulement elle pourroit par ce moyen obuier à tous troubles & inconuenients, lesquels sont suruenus en Frâce & autrepert pour ceste occasion: mais aussi ce seroit vn moyen par lequel ses subiets seroyent induits à s'employer vn chacun selon

lon sa vocation au seruice de sa Maiesté & à l'entretènement du salut & repos public. Attendu mesmemét qu'à la fin il y faudra venir avec le temps, voire & fust-ce apres son decez, ainsi qu'en tous les pays où semblables accidens sont suruenus.

Il faudra à la fin leur permettre liberté soit tard ou tost.

Inconueniens

Il reste que nous considerions les inconueniées qui en pourroyét sourdre, lesquels ie trouue estre deux principaux. Le premier que si on leur permettoit l'exercice de leur Religion, ils se pourroyent multiplier de sorte que l'ancienne Religion s'en iroit du tout à neant : ce que le Roy ne voudroit souffrir en sorte du môde. L'autre est qu'on tient communément, qu'en vn pays il n'y peut auoir deux Religions diuerſes, sans grand trouble & desordre.

Deux Religions.

Responce aux inconueniens

Quant au premier, il faut entédre, comme aussi nous auons veu par cy deuant, que toutes religions sont fondees ou sur l'autorité de Dieu, ou bié sur l'autorité des hômes. Car vne Religion se peut fonder sur l'autorité des hommes, quand ayans esgard, à ce que nos ancestres ont fait & suyui, ou à ce que nostre Roy veut, ou bien à ce que quelque grand personnage nous commâde, nous fondons nostre Religion sur le respect d'iceux sans autremét auoir quelque ferme raison ou sentiment en nos cœurs, que nous faisoſs bié ou mal :

ainsi

ainsi que les Turcs, Payens, & idolatres *Les Turcs & Payens.*
 ont presque tousiours fait, voire & la plus
 grand part du monde le fait encore au-
 iourd'huy, chageans leur dite Religion &
 façon de servir Dieu tout ainsi, & aussi sou-
 uent qu'il plait à leurdits Roys, ou aux
 personages ausquels ils donnét ce credit:
 ainsi que les Romains ont anciennement *Les Romains
ont changé
leurs sacrifi-
ces.*
 changé leurs sacrifices & ceremonies, voire
 & accreu le nombre de leurs dieux, à l'ap-
 petit de leurs Pontifes, Aruspices, Roys
 & Empereurs: les Gaulois à l'appetit de *Les Gaulois.*
 leurs deuins: les Egyptiens à la volonté
 de leurs prestres: les Perses ainsi comme
 leurs Magiciens leur donnoient à enten-
 dre, & que leurs Roys leur comandoient.

Or d'autant que ces religions ne pro-
 cedent pas du cœur craignant Dieu & re-
 ligieux, mais plustost du respect & reueré-
 ce des hommes, il est bié aisé d'empescher *Religions des
hommes peu-
uent estre
changees.*
 leur cours, & d'y en planter vn autre, par
 moyés humains, comme par armes & vio-
 lence. De sorte qu'il n'a pas esté malaisé
 aux Romains d'introduire leurs dieux &
 leurs Religions en la Grece & autres pays
 par eux conquestez: lesquels n'estoyent
 fondez que sur l'autorité de leurs Ance-
 stres & Roys.

Mais si la Religion est fondee sur l'au-
 thorité & la parole de Dieu, ou sur le tes-
 moig- *C'est autre
chose de la Re-
ligion fondee
sur la parole
de Dieu.*

moignage des consciences, soit à bõne raison ou autrement, la force & violence extérieure n'y peut du tout riẽ, comme nous auons monõtré. Et n'y a moyen au monde pour empescher le cours d'icelle, sinon en remonstrant que le fondemẽt est mal mis. Parquoy si le Roy veut maintenir l'ancienne Religion, & empescher le cours de la nouuelle, il est besoin de leur donner liberté d'estre ouys, à fin qu'ils puissent estre conuaincus, & que tout le monde cognoissant en quoy gist l'abus, se retire de leur accointance.

Liberté d'estre ouye.

Et si cest heresie ce qu'ils sement, on ne fera sinõ empescher son cours, en leur permettant liberté de publier & manifester leur doctrine, moyennant qu'à lencontre par la verité de la parole de Dieu, on remonstre au peuple leurs erreurs. Autrement, tant plus on les voudra esteindre & tant plus on les augmẽtera. Mais au contraire si parauenture leur doctrine se trouuoit conforme à la verité, il n'est aucunement à presumer que l'intẽtion de sa Majesté seroit de la vouloir opprimer. Parquoy cest inconuenient allegué n'est de nulle consequence.

Si ceux-ci peuuent prouuer leur Religion estre vray, on ne doit croire que le Roy si voudroit opposer.

Le second point semble estre de plus grand poix. Car on dit communemẽt que pour entretenir le repos public, il faut que

il

il n'y ait qu'une Loy, une Foy & un Roy.
Chose certes qui seroit grandement à desirer, d'autant qu'elle nous pourroit ramener le siecle dore.

Mais puis que la Religion & Foy est un pur don de Dieu engraue au cœur de la personne, sur lequel nul ne peut dominer sinon Dieu seul, c'est une tres-grande inconsideration de penser qu'on puisse reduire tous les habitans du pays à une mesme foy par force & violence corporelle.

Vray est que ce qu'ils disent, que tout ainsi comme en une maison, le pere de famille doit pourvoir, que tous ceux de sa maison, n'adorent qu'un seul Dieu, & soyent tous d'une mesme Religion, aussi le Roy doit procurer qu'en son Royaume il n'y ait qu'une Foy & une Loy, ce qui seroit merueilleusement bon & salutaire. Mais il n'est aucunement possible d'y paruenir, si ce n'est parauéture, entre un peuple, duquel la Religion est fondee sur la simple autorité du Roy, laquelle certes n'est point vraye religion, ains plustost une pure hypocrisie & faux semblant: auquel on pourra, peut estre, induire ceux qui sont sans crainte de Dieu. Ainsi qu'on a veu entre les Romains qui receuoient autant de nouveaux dieux, come leurs Empereurs leur commandoyent.

Les Romains receuoient autant de nouveaux dieux qu'il plaisoit aux Empereurs.

Mais

Mais cecy n'aura iamais lieu entre ceux qui ont quelque sentiment interieur fondé sur quelq̃ raison, soit de la parole de Dieu où de leur propre conscience. Car tât s'en faut qu'on puisse en tel cas reduire vn peu ple entier à vne mesme Religion, qu'à grand' peine en viendra-on à bout en vne seule famille. Ainsi quil a esté tresmanifeste

Les Philosophes recherchès entr'eux quel que fondemēt de leur Religion sont tous diuers.

Entre les Iuifs il y auoit trois sectes.

entre les Philosophes, Grecs & Romains, lesquels recherchant quelque fondemēt de leur Religion, tant seulement sur raisons humaines, furēt entr'eux si diuers & contraires, qu'aucuns maintenoyent qu'il ny auoit nul Dieu ne Religion quelconque: les autres en forgeoyent vne formilliere. Et mesmement entre les Iuifs, n'y auoit-il point trois sectes renommées, assauoir, des Phariseens, Saduceés, & Esseens plus contraires les vns aux autres, que ne sont ceux la nouuelle Religion, contraires aux autres qui se maintiennent sous l'ancienne obeïssance du Pape?

Les roys d'Egypte Perse & Babylone sont cōtraints de souffrir les Iuifs.

Mais qui est beaucoup d'auantage, il ne fut iamais veu dès le commencement du monde, iusqu'à maintenant, que tous fussent d'vne mesme Loy & Foy, ie di mesmement selon l'exercice exterieur. Car deuant l'aduenemēt du Seigneur, les roys d'Egypte, Perse, & Babylone furent contrains de souffrir les Iuifs en leur pays,

& leur permettre l'exercice de leur Religion, laquelle eux tenoyent pour abominable. Et apres son aduenement, les Empereurs Romains les ont aussi soufferts. Car on trouue que Caius leur permit de s'assembler en quelques villes pour fuiure l'exercice de leur Religion. Antonius Pius & Marcus Antonius leur ont donné, mesmemēt aux Chrestiens, vne semblable permission: non pas qu'ils fussent d'accord avecques eux, (car ils auoyent le Nom de Christ en grand horreur) mais d'autant qu'ils les cognoissoyent n'estre seditieux ne perturbateurs du repos public, & pourtant trouuoient necessaire de le faire.

*Antonius
Pius & Mar-
cus.*

On trouue aussi par les Histoires que Adrianus Seuerus Empereur, apres auoir cogneu l'humilité des Chrestiens, changea sa rigueur en douceur & leur permit l'exercice de leur Religion. Alexandre Seuerus Empereur fort recommenté par toutes les Histoires, quelque ennemy des Chrestiens qu'il fut, les souffrit toutesfois en sa Cour & leur ottroya quelques edifices, pour y faire leurs assemblees. Le mesme auons-nous veu de Constantin le pere de Constantin le grand. Et y en a plusieurs autres qui les ont soufferts, & defendu qu'on ne leur fist fascherie, combien qu'eux fussent

*Adrianus
Seuerus.*

*Alexandre
Seuerus ot-
troya temples
aux Chrestiens*

Constantin.

D d'opi-

d'opinion entierement contraire.

Vray est qu'on pourroit dire que tous ces exemples ne seruent sinon à l'aduantage de la foy Chrestienne, laquelle le Roy entend de maintenir, en extirpant la nouuelle Religion: mais quoy qu'il en soit, tât y a qu'on peut voir manifestement que ce n'est chose nouuelle d'endurer deux diuerses religions en vn pays, voire & que tous les sages Roys & Princes, selon la necessité du temps, l'ont ainsi fait. Car encore que la Religion des susdits Empereurs fust mauuaise, tant y a que quant à eux ils la tenoyent pour bonne & sainte, tout ainsi que le Roy tient la sienne. Et c'estoit la Religion qu'ils auoyent receuë de leurs ancestres passé plus de trois ou quatre mille ans.

Mais on trouue aussi d'auantage que les Empereurs Chrestiens & Orthodoxes ont aucunes fois aussi supporté des faulles religions. Ainsi qu'il appert par l'exemple de Theodosius, Honorius, & Arcadius, lesquels ont donné des temples aux Arriens & aux Nouations, quelques fois dedans la ville, quelque fois dehors, selon la necessité des temps & lieux. Et l'histoire Ecclesiastique raconte pour vne chose notable que Valentinianus Empereur fust orthodoxe

Ce n'est chose nouuelle d'endurer deux sortes de Religion.

Les Empereurs Payens tenoyent leur Religio aussi bonne que le Roy tient la sienne.

Les Empereurs Chrestiens ont donné des tēples aux Arriens

doxe & bon Chrestien, mais il souffrit toutesfois les Arriens combien qu'il se monstra plus fauorable aux autres.

Au contraire, Valens son College, & compagnon à l'Empire estoit Arrien, & ne voulut souffrir les Chrestiens en son gouuernement, ains les dechassa & persecuta en toutes manieres. Si qu'on peut aisement recueillir de là, qu'en toutes Republiques bien policees pour eiter seditions & tumultes il est aucunesfois necessaire de donner temples aux heretiques, non pas à fin qu'ils sement leurs erreurs plus auant, mais au contraire à fin que le peuple en oyant confronter la verité avec le mésonge puisse (sans exciter mutineries & tumultes) paisiblement estre rangé à la vraye & droite Religion.

Nota.

Mais quoy ? nostre Seigneur ne dit-il pas ouuertement qu'il est venu mettre discord & non point la paix, si qu'en vne mesme maison l'un fera cōtraire à l'autre, & y aura dissension entre pere & fils, frere & frere, &c. Cōment donc pourra-on maintenir la Religion de Iesus Christ, si quant & quant on veut reduire tout le monde à vne mesme Loy & Foy ? Attendu mesmement que pour y mettre ordre, il ne commande pas que les fideles tuent les

Il faut qu'il aduienne des troubles pour la vraye Religion.

les autres, mais plustost au contraire il dit que les Apostres & fideles sero nt trahis, excômunie z , & mis à mort à cause de leur Foy & Religion.

Et pourtant il veut qu'ils gagnent le camp par patience & par la vertu de sa parole . Si que ie ne puis assez m'esbahir de l'impudence de ceux lesquels voulans estre tenus pour gens exercez en toute l'antiquité des Histoires , osent bien maintenir qu'en vne republique, il n'y a iamais eu de Religions diuerfes.

*L'impudence
de ceux qui
disent, qu'en
vne republi-
que il n'y eust
iamais deux
sortes de Re-
ligions.*

Car que respondront-ils à la diuersité ia alleguee entre les Pharise ens, Saduceens, & Esseens , afin que ie ne touche aux Samaritains, lesquels estoyent comme ennemis de tous les Iuifs en commun? Certes ils ne trouueront iamais qu'a cause des ces sectes , il y ait eu grande difficulté aux gouuernemēs, ne mesmement que Iesus Christ ou les Apostres ayent commandé de les brusler pour leur Foy , afin que tous fussent reduits a vne mesme Loy & Foy.

Que diront-ils sur la diuersité des Religions qui iadis fut entre les payés, desquels les vns ne cognoissoyēt point les dieux des autres, voire & non pas de nom, aucuns aussi maintenoyēt publiquemēt que Dieu ne se soucioit des choses humaines. Et toutesfois

tesfois on ne trouue pourtant que le gouuernement des Romains en ait esté troublé à ceste occasion, mais qui est celuy qui ne voit aujourd'huy sous le grand Turc, vne tres-grande diuersité de religions? si qu'entre les Chrestiens seuls, il en y a de quinze à vingt sectes & religions diuerses.

*Sous le Turc
il y a vne grã
de diuersité
de Religions,
& tous viuēt
en paix.*

Et puis il ya des Iuifs, des Perfes, & les Mahumetistes, tous subiets à son Empire, plus contraires toutesfois l'un à l'autre au fait de la Religion que l'eau n'est contraire au feu. Certes si telles diuersitez estoient la vraye cause des seditions & tumultes il ne seroit possible que la puissance du Turc fut deuenue si grande.

C'est donc vne grande ignorance d'estimer qu'on ne puisse maintenir en tranquillité les subiets quand ils sont de diuerses religions. Car qui considerera de pres la source des tumultes & seditions, il trouuera qu'elle ne procede pas tant de la diuersité de religions, comme de quelques passions particulieres, ainsi qu'est auarice, ambition, haine, vengeance & autres semblables, lesquelles peuuent soudre des moindres differens du monde. Et quand le Magistrat n'y met bon ordre, alors elles senslément petit a petit, & viennent a cau-

*Nota.
Les troubles
n'aduient
pas tant de la
diuersité des
religions, que
des passions
particulieres.*

fer quelque tumulte & sedition publique.

On a veu les troubles & seditions aue-
nus en Italie entre les Guelphes & Gibel-
lins , qui ont duré plus de trois ou quatre
cés ans , & causé vne infinité des meurtres
rauissemés, guerres, & toutes sortes de vio-
lence . Et toutesfois il n'y auoit nul dif-
ferent en la Religion , mais le tout proce-
doit de ce que le Magistrat nourrissoit les
passions particulieres des leurs subiets , en
lieu de les esteindre , & réprimer par bon-
ne iustice, voire & fauorisoit ou d'un costé
ou d'autre. Le semblable a-on veu au pays
de Hollande entre ceux qui s'appelloient
Houc & Cabillaux. Et quât aux differens
de la Religion , il n'y a pas deux cens ans
que le debat qui estoit entre les Corde-
liers & Iacopins , pour la conception de la
vierge Marie , auoit causé grands troubles
par toute la Chrestienté. Non pas que le
different fust de si grande consequence,
mais pour la negligéce des Magistrats, les-
quels nourrissoient ces factions , & sans
vouloir à bon escient en prendre la co-
gnoissance , se formoyent parties ou d'un
costé ou d'autre.

Puis donc qu'il appert qu'estant establi
vn bon ordre , on a maintenu des peuples
des sectes & tres-diuerfes religions en vn
bon

*C'est vn pro-
uerbe Fla-
mand qui si-
gnifie, n'estre
ne d'un ne
d'autre.*

*Le trouble
aduenu entre
les Cordeliers
& les Iaco-
pins.*

bon accord sans nulle sedition du monde : & au contraire , n'y estant point cest ordre non pas seulement la diuersité de la Religion, mais toutes differens & diuersitez quelques petites qu'elles fussent , ont causé horribles seditions & tumultes.

Certes tout homme de bon iugement peut recueillir par là , que les seditions & tumultes , ne prennent pas leur accroissement, selon l'importance des differens sur lesquels ils sont fondez , mais plustost la faute de bon ordre. D'autant que les Magistrats sont negligens à chastier ceux qui l'entretiennent par dessus leur vocation, ou bien mesmement ils soustiennent l'un party & vueillent opprimer l'autre , si que entre les officiers mesmes il y a des picques, & le peuple prennant pied là dessus, pense luy estre licite d'vsurper le glaive luy-mesme , pour ruiner ceux lesquels non seulement il hayt, mais aussi il voit estre des fauorisez du Magistrat, & de ceux qui sont puissans , soit en l'estat politique ou ecclesiastique.

Faute de bon ordre fait les seditions.

Ainsi lisons-nous la sedition de Ierusalem estre aduenüe , poutce que Zorobabel estant retourné pour edifier le temple suyuant la permission du Roy Cyrus:

*Sedition en
Ierusalem &
d'où prouenuë*

1. Efd. 4. 9

3. Efd. 6. 3.

1. Efd. 6. 13.

Il y eut Rehum le chef du conseil du Roy. Samfai le secretaire, Sifenes gouuerneur de Syrie & de Phenice avec Strabuzannes & ses compagnons, lesquels non-obstant l'edict du Roy, se monstrerent si bië parties contre les Iuifs, qu'ils leur conciterent la haine du peuple & ainsi avec grans tumultes fut empeschee l'edification du tēple iusq̃s à ce que Darius y eust enuoyé les mesmes gouuerneurs qui taschoyent d'empescher les Iuifs Tathanai & les autres, par l'aide desquels le tēple fut acheuë, & le repos public redressé, pourautant que non seulement il ne se partialisoient pas contre les Iuifs, mais aussi reprimoyēt l'insolēce de leurs haineurs. A Rome sont aduenus pour le fait de la Religion deux grands tumultes le premier du temps de Tiberius, d'autant que le Senat de Rome ne voulut obeir à son commandement, par lequel il auoit decreté que Iesus Christ seroit raporté au nombre des dieux. L'autre du temps de Commodus lequel ayant publié vn edit qu'on n'eust à persecuter de là en auant les Chrestiens, non obstant cela le Senat mit a mort vn honorable Senateur, nommé Apollonius pour faire profession de ladite Religion.

*Deux grans
troubles ad-
uenues à Ro-
me pour la
Religion.*

Ou trouue aussi par les Histoires que les
tumultes

tumultes aduenus aux pays du Lyonnois & de Viéne du téps de Antonius & Verus Philosophes Empereurs, sont tous aduenus par la faute des gouuerneurs, lesquels contre le mandement des Empereurs, se partialisoient contre les Chrestiens, & esmouuoient le peuple à sedition. Et de fait qu'on espluche par le menu, les troubles derniers de France on trouuera que la plus grand' part est aduenüe, par ce qu'aucuns puissans, ou bien les gouuerneurs mesmes n'ayans esgard au bien public, n'y mesmement aux ordonnances des Estats ont voulu a leur poste faire l'office du Roy, & se formaliser de leur propre autorité contre ceux de la nouvelle Religion.

Des tumultes aduenus à Lyon.

Tous les troubles procedent plus par les Gouuerneurs que par le commun peuple.

La cause des troubles de la France.

Car certes ie n'estime qu'il y ait homme si ignorant qui ne sache assez, que le meurtre fut a Vassly par monsieur de Guise contre les ordonnances du Roy & des estats, à esté la vraye & vnique cause des guerres ciuiles qui en sont ensuiuies, à la grande ruine de tout le pays de France. Car aussi long temps que les Roys y ont procedé de leur autorité, iamais on n'a ouy nouuelles de seditions quelques griefues persecutions que lon ait oncques dressées.

Le meurtre fait à Vassly par monsieur de Guise contre les ordonnances du Roy cause des troubles.

Mais aussitost que les Gouuerneurs de

D 5

leur

Les Gouuerneurs.

leur autorité , propre se sont formalisez cōtre ceux de ladite Religion, incontinent tout cest esclandre est suruenu , lequel nous doit seruir de bon exemple , à fin que par la nous appreniōs d'eiter semblables inconueniens , pour suyure quelque bon moyen, à l'auantage du Roy & au bien de tous ses subiets.

*Note le bon
conseil.*

Il est donc bien aisé à resoudre que vn bon ordre y sera mis , quand ainsi que le Roy permettra , liberté sera donnee à ceux de la nouuelle Religion , de s'assembler & exercer leur discipline , les bridant de telles loix qu'il luy semblera bō , & que le Magistrat & Officiers du Roy seront ententifs à maintenir telle intention de sa Maiesté, gardās sur toutes choses que le peuple ne s'vsurpe l'autorité du glauiue, sous ombre des partialitez des grands . de sorte que sur toutes choses il faudra dōner ordre que toutes violēces soyent inhibees d'vn costé & d'autre , & que ceux qui procedēt par autre moyē illicite, ou de blasmes & mesdisances soyēt tresbien chastiez, qui fera certes vn moyē tref-assuré, & les subiets se rēdront en bonne vnion & accord par ensemble , & porteront vne parfaite obeïssance a sa Maiesté.

Et cependant, la verité descouurira si
bien

bien le mensonge , que le Roy n'aura de. *La verité*
 quoy craindre que les heresies se doyuent *descourira*
 multiplier par ce moyen, pour exterminer *le mensonge.*
 la verité. Mais au contraire on verra incon-
 tinent la verité florir , & toutes heresies &
 fausses sectes aller en decadence. Et la gloi-
 re de Dieu estre par tout celebree , & la
 grandeur du Roy & sa prosperité prendre
 tout heureux accroissement. Ce que Dieu
 nous vueille ottroyer par sa sainte
 grace, auquel soit toute gloire &
 honneur és siecles des sie-
 cles. Amen.



A' SEDAN,

Par Gofuin Goeberi.

M. D. L X V.

Handwritten text, likely a letter or document, written in cursive script. The text is mostly illegible due to fading and bleed-through from the reverse side. It appears to be a formal communication, possibly a letter of introduction or a business document.

Handwritten signature or name, possibly "John Smith" or similar, written in cursive script.

Printed text, possibly a date or a reference number, located below the signature.

Printed text, possibly a title or a heading, located below the date/reference.

Printed text, possibly a closing or a footer, located at the bottom of the main text block.



